

МАЯ В 11-й ДЕНЬ
СВЯТАГО СВЯЩЕННОМУЧЕНИКА ИОСИФА,
МИТРОПОЛИТА АСТРАХАНСКАГО
НА ВЕЛИЦЕЙ ВЕЧЕРНИ

На Господи, воззвах: стихиры праздника 3 и святителя 5, глас 5:

Святителю Богоблаженне Иосифе, * радуется град Астрахань * в день торжества твоего, * теплый молитвенниче * и предстателю ко Господу.

Приидите, вернии, * во псалмех и пениих ублажим святителя Иосифа, * веры бо чистыя и правыя светильник явися, * Господа и люди своя всем сердцем возлюбив, * смерти не убоясь, * но душу за овцы своя положи * и ныне молится ко Господу * даровати нам мир и велию милость.

Богосветлое светило града Астрахани * и всяя повожская земли, * святителю Богомудре Иосифе, * лучами любве Христовы просвещен, * молитвенник усердный явился еси, * скорбящих же утешитель * и в нуждах скорый помощник; * и ныне молися ко Господу * даровати нам мир и велию милость.

Святителю Иосифе, * верный служитель Божий был еси, * с паствою своею постыся * и о победе на враги усердно моляся, * мятежники же увещая покоритися Богу и власти законней, * сего ради мучение и смерть приял еси, блаженне, * положив душу за овцы своя, * и ныне молися ко Господу * даровати мир и велию милость.

Слава, глас 1:

Святителю Богоблаженне Иосифе! * Радуются в день торжества твоего земная и Небесная, * веселится лик святителей и мучеников, * предстоящих с тобою Троице Единосущней, * и град Астрахань светло торжествует и верою вопиет: * радуйся, святителю Иосифе, * теплый молитвенниче * и предстателю наш ко Господу.

И ныне, праздника или Богородичен:

Всемірную славу, * от человек Прозябшую, * и Владыку Рождшую, * Небесную Дверь воспоим Марию Деву, * Безплотных Песнь, и верных Удобрение: * Сия бо явися Небо, и Храм Божества: * Сия преграждение вражды разрушивши, * мир введе, и Царствие отверзе. * Сию убо имуще веры Утверждение, * Поборника имама из Нея Рождшагося Господа. * Дерзайте убо, дерзайте людие Божии: * ибо Той победит враги, * яко Всесилен.

Вход. Прокимен дне. Чтения три святительская.

На литии стихира, глас 6:

Святителю и мучениче Иосифе, * егда от стены града свержен был еси, * обагрив землю кровию твоею, * тогда страна Астраханская горько плакася, вопия: * померче солнце мое, сокрыхся духовный свет. * Ныне же радуется и светло торжествует, * яко явися ей молитвенник теплый, * чудотворец дивный, * и с молитвою притекает к тебе, предстателю своему, * всем бо источаеши исцелений благодать * и освещаеши путь из тьмы греховныя * к Невечернему Свету.

Слава, и ныне, Богородичен.

Творец и Избавитель мой, Пречистая, * Христос Господь, * из Твоих ложесн
прошед, * в мя Оболкийся, * первья клятвы Адама свободы. * Темже Ти, Всечистая, *
яко Божии Матери же и Деве воистинну, * вопием немолчно: * радуйся Ангельски, *
радуйся, Владычице, * Предстательство и Покрове * и Спасение душ наших.

На стиховне стихиры, глас 7:

Блажен еси, святителю Иосифе, * путем бо Христовым воистинну шествовав, *
любовию и молитвами люди ко Господу приводил еси * и, пострадав за правду, *
яко звезда светлая, возсиял еси, * к Свету Незаходимому * и нас возведи молитвами
твоими.

Стих: Честна пред Господом * смерть преподобных Его.

В соборице злодеев незаконных * со крестом святым безбоязненно пришел
еси, * покоритися Богу и властем увещевая, * мятежницы и разбойницы, злобою
лютою одержими, * погубити тя восхотеша, * и огнем и всякими мучении пытаху
тя, * и с раската свергоша. * И ныне чтущим тя у Господа испроси * греховныя
жизни исправление.

Стих: Что воздам Господеви о всех, * яже воздаде ми?

Поношение от разбойник претерпев и мучение, * Христу, пострадавшему за ны,
последовал еси * и, с высоты свержен, священномучениче, * к высоте Небесней
возшел еси, * идеже присное радование и бессмертная жизнь, * ихже и да
сподобимся получитьи молитвами твоими.

Слава, глас 6:

Святителю Богомудре Иосифе, * во вся страны поволжския изыде вещание
исправлений твоих, * темже на Небесех обрел еси мзду трудов твоих, * демонов
победил еси полки * и мучеников достигл еси чины, * ихже страданием поревновал
еси. * Дерзновение имея ко Господу, * мир испроси душам нашим.

И ныне, праздника или Богородичен: глас 6.

Творец и Избавитель мой, Пречистая, * Христос Господь, * из Твоих ложесн
прошед, * в мя Оболкийся, * первья клятвы Адама свободы. * Темже Ти, Всечистая, *
яко Божии Матери же и Деве воистинну, * вопием немолчно: * радуйся Ангельски, *
радуйся, Владычице, * Предстательство и Покрове * и Спасение душ наших.

Тропарь, глас 6:

Подвигом добрым подвизався, * жизнь твою страданиями за правду увенчав, *
преселился еси в Небесныя обители, * идеже предстоя Престолу Святыя Троицы, *
моли, святителю Иосифе, * граду Астрахани и отечеству нашему в мире спастися.

Слава, и ныне, Богородичен.

Благословенную Нарекий Твою Матерь, * пришел еси на страсть вольным
хотением, * возсияв на Кресте, взыскати хотя Адама, * глаголя Ангелом: срадуйтесь
мне, * яко обретесе погибшая драхма. * Вся мудре Устроивый, Боже наш, слава Тебе.

НА УТРЕНИ

На Бог Господь: Тропарь, глас 6:

Подвигом добрым подвизався, * жизнь твою страданиями за правду увенчав, * преселился еси в Небесныя обители, * идеже предстоя Престолу Святыя Троицы, * моли, святителю Иосифе, * граду Астрахани и отечеству нашему в мире спастися. [Дважды.]

Слава, святителя. И ныне, праздника.

По 1-м стихословии седален, глас 4:

Укоризны и поношения от мятежников прием * и огненное мучение претерпев, * чашу страданий испил еси, * за правду и верность власти законней подвизався, * со стены града свержен и кровию землю обогрив, священномученик явился еси. * Сего ради зовем: * спасай нас, святителю Христов, молитвами твоими.

Слава, и ныне, праздника или Богородичен, глас 4:

Преблагословенная Марие Богородице Всепетая, * Заступнице наша усердная, * спаси нас от бед и страстей молитвами Твоими.

По 2-м стихословии седален, глас 6:

Святителю Иосифе, * помощник в бедах и болезнях являешься людям благочестивым, к тебе прибегающим. * И ныне молим тя: * от всякия напасти сохраняй нас молитвами твоими.

Слава, и ныне, праздника или Богородичен, глас 6:

Пресвятая Мати Дево, Христа Избавителя рождающая, * к Тебе прибегаем: * спаси нас от бед, Марие Богоневесто.

По полиелеи седален, глас 1:

Добр воин Христов и спасения проповедник был еси, святителю Иосифе, * егда мятежники покорятся Богу и власти законней увещал еси, * вся же люди верны быти своему долгу наставляя еси. * Сего ради молим: * утверди и наша сердца во единомыслии и любви к отечеству молитвами твоими.

Слава, и ныне, праздника или Богородичен, глас 1:

Всесвятая Дево Чистая, * предстательство и покров к Тебе прибегающих, * Тебе молимся, Владычице: * спаси нас от бед молитвами Твоими.

Степенна, глас 4. Антифон 1-й, ихже стихи повторяюще поем:

От юности моя * мнози борют мя страсти, * но Сам мя заступи, * и спаси Спасе мой.

Ненавидящии Сиона, * посрамятся от Господа, * яко трава бо огнем * будете изсохше.

Слава: Святым Духом * всяка душа живится, * и чистотою возвышается, * светлеется Троическим Единством священнотайне.

И ныне, тойже.

Прокимен, глас 1:

Прокимен: Уста моя возглаголют премудрость * и поучение сердца моего разум.

Стих: Уста праведнаго поучатся премудрости, и язык его возглаголет суд.

Евангелие от Иоанна, зачало 36.

Рече Господь ко пришедшим к Нему иудеем: Аз есмь дверь, Мною аще кто внидет, спасется, и внидет, и изыдет, и пажить обрящет. Гать не приходит, разве да украдет, и убьет, и погубит, Аз приидох, да живот имут и лишше имут. Аз есмь пастырь добрый, пастырь добрый душу свою полагает за овцы. А наемник, иже несть пастырь, емуже не суть овцы своя, видит волка грядуща и оставляет овцы, и бегаєт, и волк расхитит их, и распудит овцы. А наемник бежит, яко наемник ест и не радит о овцах. Аз есмь пастырь добрый, и знаю Моя, и знают Мя Моя. Якоже знает Мя Отец, и Аз знаю Отца, и душу Мою полагаю за овцы. И ины овцы имам, яже не суть от двора сего, и тыя Ми подобает привести, и глас Мой услышат, и будет едино стадо, и един Пастырь.

По 50-м псалме

Слава: Молитвами апостолов, * Милостиве, очисти * множества согрешений наших.

И ныне: Молитвами Богородицы, * Милостиве, очисти * множества согрешений наших.

Таже, глас 6: Помилуй мя Боже * по велицей милости Твоей, * и по множеству щедрот Твоих * очисти беззаконие мое.

Стихира, глас 6:

Звезда светлая Астраханския Церкви * и святителей ея слава и похвала явился еси, Иосифе, * от беззаконных убиенный молитвенник усердный, * Господа и люди своя до конца возлюбивый * и душу свою за други положивый, * ныне жребий твой со святыми; * сего ради зовем: * Иосифе, святителю убиенный, * моли о душах наших.

Канон праздника со ирмосом на 6 и святителя на 8.

Канон святителю Иосифу, глас 8.

Песнь 1

Ирмос: Колесницегонителя фараоня погрузи * чудотворяй иногда * Моисейский жезл, крестообразно поразив * и разделив море, * Израиля же беглеца, пешеходца спасе, * песнь Богови воспевающа.

Воспоим светло и восхвалим песньми честную память святителя Христова, * возлюбив бо Пастыря овцам — великаго Христа, * не убоясь разбойник, * но душу за овцы своя положи.

Егда разбойницы и преступницы вступиша во град Астрахань, * тогда злодейства и ужасы велии совершахуся. * Ты же, архипастырю добрый, * укрыл еси мирныя люди в доме твоєм.

К жизни нестареющей и присносущней преставился еси, * Богомудре святителю Иосифе, * еяже и нас, молящихся тебе, твоими молитвами сподоби.

Богородичен: Надежда, и предстательство, и покров буди, Дево, рабом Твоим, * да, Тобою избавленнии от бед, возвеличим Тя светло, * яко Истинную Матерь Истиннаго Света.

Катавасия праздника.

Песнь 3

Ирмос: Утверждаей в начале Небеса разумом * и землю на водах основавый, * на камени мя, Христе, заповедей Твоих утверди, * яко несть свят, паче Тебе, Едине Человеколюбче.

Добр воин Христов явился еси, святителю: * взем бо меч духовный слово Божие, * мятежники от Божественнаго Писания увещевал еси, * привести хотя их ко Христу Богу.

Утвержден на камени заповедей Христовых, святителю, * разбойником и мятежником дерзновенно вещал еси: * престаните от зол ваших и покоритесь Богу и власти законней, * да обрящете прощение, и милость, и покой душам вашим.

Людие беззаконнии и жестокии сердцем * не послушаша словес любве твоя * и на муки огня осудиша тя, злобою горяще, * не любит бо законопреступный обличающих его.

Богородичен: Небо небес и святая святых явилася еси, Приснодево, * Творец бо и Вседержитель Небесе и земли * в Тебе таинственно вселися.

Кондак и икос праздника.

Седален святителя, глас 1:

Иосифе священномучениче, от мятежник убиенный, * в мире и покои праведных ныне пребываеши, якоже писано есть: * праведных души в руце Божией и не прикоснется их мука. * Даруй мир и нашим душам, страстей возстание укротив, * да в присносущный достигнем покой молитвами твоими.

Слава, и ныне, праздника или Богородичен, глас 1:

Чудо чудес, Благодатная, в Тебе зрящи, тварь радуется: * зачала бо еси безсеменно и родила еси неизреченно, * Егоже чиноначалия Ангелов видети не могут; * Того моли о душах наших.

Песнь 4

Ирмос: Ты моя крепость. Господи, * Ты моя и сила, * Ты мой Бог, Ты мое радование, * не оставль недра Отча * и нашу нищету посетив. * Тем с пророком Аввакумом зову Ти: * силе Твоей слава, Человеколюбче.

Егда свергоша тя со стен града, * шум бысть велий, и злодеи от страха омертвеша, * на месте же, идеже повержено бысть тело твое, * видеша мнози три свечи горящая: * преставился бо еси от смерти к жизни, * идеже сияет незаходимый свет Святыя Троицы.

Препоясався силою свыше, священномучениче, * подвигом добрым подвизался еси, блаженне, * обидимых защищая, печальных утешая, * упорных же и злых с кротостию обличая и вразумляя. * И ныне радуешься светло, * идеже правда и мир и радость о Господе нашем.

Красуйся светло и ликуй, граде Астрахань, * имея Небеснаго заступника и покровителя, святителя Иосифа, * во славе Небесней предстояща великому Царю и молящаяся, * да чтущии память его, избегше греховныя тьмы, * сынове Света будут.

Богородичен: Жилище Света явила еси, Богомати, * Солнце бо славы — Господь из Тебе возсия * и нам отверзе врата к Незаходимому Свету.

Песнь 5

Ирмос: Вскую мя отринул еси * от лица Твоего, Свете Незаходимый, * и покрыла мя есть чуждая тьма, окаяннаго, * но обрати мя и к свету заповедей Твоих * пути моя направи, молюся.

Прискорбна бысть душа твоя, священномучениче, * егда прииде час твой взятю тебе быти мятежники, * но, молитвою во храме укрепився, * мужественно к ним изшел еси.

В ризах святительских и со святым крестом безбоязненно вшед в соборище мятежников, * дерзновенно, яко пророк Божий, глагола еси: * почто звасте мене, татие и клятвопреступницы? * Оставьте упорство ваше и злобу, * помилет вы благоверный царь, истину глаголю, на мя положитесь.

Яко аспиды глушии, словес твоих не слушаша врази твои, святителю Иосифе, * и, емше тя, огнем пытаху и всякими мучении и с высоты свергоша тя. * Ты же, к высоте Небесней возшед, * в Вышний град святых направляеши всех, чтущих тя, священномучениче.

Богородичен: Всесвятая Дево, Мати всех Царя, * Жизнь и воскресение всех из Тебе возсия, * да, смертную силу сокрушив, спасет яко Бог поющия Тя.

Песнь 6

Ирмос: Очисти мя, Спасе, * многа бо беззакония моя, * и из глубины зол возведи, молюся, * к Тебе бо возопих, и услыша мя, * Боже спасения моего.

Исцели недуги и болезни наша, Спасе, молитвами святителя Твоего, * Тобою бо прославлен быв, * всем исцеления подает возложением честных власяницы его.

Чудотворения дар подаде тебе Христос, святителю; * темже немому уста силою Господней отверзл еси, * и той прослави тя и возблагодари Господа, * давшего такуюю власть избранником Своим.

Жена кровоточива, вотще иждившая имение свое на врачевание земное, * коснувся края риз Господних, исцеление прият. * И в тебе, священномучениче, вселися сила Христова: * власяница бо твоя честная, с молитвою на болящия возлагаемая, * скорое исцеление подает.

Богородичен: Спасение уповающим на Тя буди, Пречистая Дево. * Много бо может молитва Твоя, о Мати Милосердая. * Ты бо избавляеши от бед и страстей души наша.

Кондак, глас 2:

Яко звезда пресветлая, * возсиял еси, святителю Иосифе, во Астрахани, * идеже родился и воспитался еси * и за верность Богу и властем законным мученическую смерть приял еси. * Мы же, чтущие страдания твоя, зовем ти: * святителю Иосифе, от мятежников убиенный, * моли Христа Бога о душах наших.

Икос: Возлюбив, святителю, Христовы Божественныя заповеди * и возненавидев мира сего наслаждение, * пришел еси усердно к Тому * и был еси светильник, просвещающий вся поволжския страны блистанием духовным. * Тем, припадая, молим тя: * просвети наша очи душевныя воспети твоя подвиги, * пощение, и бдение, и мученическую кончину, * ихже ради блаженныя жизни ныне наслаждаешься; * мы

же, чтуще тя, вопием: * святителю Иосифе, от мятежников убиенный, * моли Христа Бога о душах наших.

Песнь 7

Ирмос: Божия снизхождения * огонь устыдеса в Вавилоне иногда. * Сего ради отроцы в печи, радованною ногою, * яко во цветнице, ликующе, пояху: * благословен еси, Боже отец наших.

Отроцы, огня избавленнии, радостно воспеваху Спаса и Избавителя; * ты же, священномучениче, опаленный огнем вещественным, * пламене вечнаго избавился еси, вопия: * благословен еси, Господи, Боже отец наших.

Ум и сердце твое, святителю, * посреде огненнаго мучения ко Господу устремляя еси, яко трие отроцы, взывая: * благословен еси, Боже отец наших.

Со отроки и всеми святыми ликуеши, блаженне, во Царствии Небеснем * и радостно поеши Невечернему Свету: * благословен еси, Господи, Боже отец наших.

Богородичен: Благословенна и препрославлена еси во веки, Похвало христиан, * веселие всех и радость, Марие Богоневесто, * радость бо источаеши всем, к Сыну Твоему вопиющим: * благословен еси. Боже отец наших.

Песнь 8

Ирмос: Седмерицею печь * халдейский мучитель * Богочестивым неистовно разжже, * силою же лучшею спасены, сия виде, * Творцу и Избавителю вопияше: * отроцы, благословите, * священницы, воспойте, * людие, превозносите во вся веки.

Радости неизреченныя причастник явился еси, священномучениче, * присно в Бозе пребывая * и в час мучения из глубины души твоя вопия ко Господу: * отроцы, благословите, священницы, воспойте, * людие, превозносите Христа во веки.

Егда ведоша тя беззаконнии на стену града, * яко подражатель Христу, возвед очи на небо, молился еси о обидящих тя, блаженне: * Господи, не помяни им греха сего. * Священницы же градстии, к ногам твоим со слезами припадающе, * даша ты последнее целование, * отходил бо еси ко Господу, вопия: * отроцы, благословите, священницы, воспойте, * людие, превозносите Христа во веки.

Ангельски на земли пожил еси, Иосифе, * и по преставлении твоем вкупе со ангельскими лики во обители Небесныя водворился еси, вопия: * отроцы, благословите, священницы, воспойте, * людие, превозносите Христа во веки.

Богородичен: Три отроки от печи свободивый, * всех от печи напастей избавляет ходатайством Твоим, Пречистая, * Сын Твой и Бог наш, Емуже вопием: * отроцы, благословите, священницы, воспойте, * людие, превозносите Его во веки.

Песнь 9

Ирмос: Ужасеса о сем Небо, * и земли удивишася концы, * яко Бог явися человеком плотски * и чрево Твое бысть пространнейшее Небес. * Тем Тя, Богородицу, * Ангелов и человек чиноначалия величают.

Пищи нетленныя, света Божественнаго * и славы присносущныя ныне наслаждаеши, священномучениче, * вкупе со ангельскими чиноначалии и всеми святыми Господа величая.

Яко церковное светило, святителю,* в песнях и пениях почитаем тя вси,* достойно величающе.

Предстоя во славе Царю и Богу, священномучениче Иосифе,* храни землю Российскую и град наш от всех бед молитвами твоими.

Богородичен: Слава Тебе, Препоблагословенная Марие,* Мати Господа нашего и Творца.* Да сподобимся и мы молитвами Твоими вечныя славы Его.

Светилен:

Светильниче Церкви Астраханския, святителю Иосифе,* предстоя ныне Превечному Свету,* и нас настави во свете заповедей Божиих ходити,* да приидем и мы в обители света.

Слава, и ныне, праздника или Богородичен:

Пречистая Дево, рождающая Свет Непреступный,* озари нас светом Божественнаго лика Твоего,* да возрадуемся о Тебе, Радосте наша.

На хвалитех стихиры на 4, глас 2:

Ангели на Небеси и человецы на земли,* воспойте и прославите великаго заступника нашего святителя Иосифа,* Ангел бо земный и человек Небесный явися,* праведным житием и любовию,* верою и чистотою подражая Владыце и Господу своему,* положи душу свою за люди своя* и, ныне в Вышних водворяясь, светло ликует.

Труба правды Божия явился еси, святителю,* всех бо вел еси ко Истинному Свету,* безбоязненно всем истину глаголя,* мук и смерти не убоялся еси.* Да приидем тобою и мы к Солнцу Правды,* просветленными умы созерцати во Святей Троице правду вечную.

Верны быти Богу и властем люди твоя наставляя,* мучение огненное и смерть приял еси,* с высоты раската свержен был еси.* И ныне, вкупе с мученики и архиереи Господу поклоняясь,* моли спастися душам нашим.

Слава, глас 6:

Приидите днесь, людие,* возрадуемся светло и прославим святителя нашего Иосифа,* согласно воспевающе:* радуйся, священномучениче;* радуйся, чудотворче;* радуйся, скорый наш заступниче, святителю Иосифе.

И ныне, праздника или Богородичен, глас 6:

Упование непостыдное и радость Небесную* имеем в Тебе, Богомати,* Ты бо еси наше спасение, и помощь,* и крепкое заступление,* Тя воспеваем во веки.

НА ЛИТУРГИИ

Блаженны от канона, песни 3-я и 6-я.

Добр воин Христов явился еси, святителю: * взял бо меч духовный слово Божие, * мятежники от Божественнаго Писания увещевал еси, * привести хотя их ко Христу Богу.

Утвержден на камени заповедей Христовых, святителю, * разбойником и мятежником дерзновенно вещал еси: * престаните от зол ваших и покоритесь Богу и власти законней, * да обрящете прощение, и милость, и покой душам вашим.

Людие беззаконнии и жестокии сердцем * не послушаша словес любви твоя * и на муки огня осудиша тя, злобою горяще, * не любит бо законопреступный обличающих его.

Небо небес и святая святых явилася еси, Приснодево, * Творец бо и Вседержитель Небесе и земли * в Тебе таинственно вселися.

Исцели недуги и болезни наша, Спасе, молитвами святителя Твоего, * Тобою бо прославлен быв, * всем исцеления подает возложением честных власяницы его.

Чудотворения дар подаде тебе Христос, святителю; * темже немому уста силою Господней отверзл еси, * и той прослави тя и возблагодари Господа, * давшего такуюю власть избранником Своим.

Слава: **Ж**ена кровоточива, вотще иждившая имение свое на врачевание земное, * коснувся края риз Господних, исцеление прият. * И в тебе, священномучениче, вселися сила Христова: * власяница бо твоя честная, с молитвою на болящая возлагаемая, * скорое исцеление подает.

И ныне: **С**пасение уповающим на Тя буди, Пречистая Дево. * Много бо может молитва Твоя, о Мати Милосердая. * Ты бо избавляеши от бед и страстей души наша.

Тропарь, глас 6:

Подвигом добрым подвизався, * жизнь твою страданиями за правду увенчав, * преселился еси в Небесныя обители, * идеже предстои Престолу Святыя Троицы, * моли, святителю Иосифе, * граду Астрахани и отечеству нашему в мире спастися.

Кондак, глас 2:

Яко звезда пресветлая, * возсиял еси, святителю Иосифе, во Астрахани, * идеже родился и воспитался еси * и за верность Богу и властем законным мученическую смерть приял еси. * Мы же, чтущие страдания твоя, зовем ти: * святителю Иосифе, от мятежников убиенный, * моли Христа Бога о душах наших.

Прокимен, глас 7:

Прокимен: Честна пред Господем смерть * преподобных Его.

Стих: Что воздам Господеви о всех, яже воздаде ми?

Апостол к Евреям, зачало 318.

Братие, таков нам подобаше Архиерей, преподобен, незлобив, безсквернен, отлучен от грешник и вышше Небес быв. Иже не имать по вся дни нужды, якоже первосвященницы, прежде о своих гресех жертвы приносить, потом же о людских:

сие бо сотвори единою, Себе принес. Закон бо человеки поставляет первосвященники, имущия немощь, слово же клятвенное, еже по законе, Сына во веки совершенна. Глава же о глаголемых: такова имама Первосвященника, иже седе одесную Престола Величества на Небесех, святым служителъ и скинии истинней, юже водрузи Господь, а не человек.

Аллилуиа, глас 2: Священницы Твои облечутся в правду, и преподобнии Твои возрадуются.

Евангелие Луки, зачало 24:

Во время оно, ста Иисус на месте равне, и народ ученик Его, и множество много людей от всея Иудеи и Иерусалима, и помория Тирска и Сидонска, иже приидоша послушати Его и исцелитися от недуг своих, и страждущии от дух нечистых, и исцеляхуся. И весь народ искаше прикаться Ему, яко сила от Него исхождаше, и исцеляше вся. И той возвед очи свои на ученики своя, глаголаше: блажени нищии духом, яко ваше есть Царствие Божие. Блажени, алчущии ныне, яко насытитесь. Блажени, плачущии ныне, яко возсмеетесь. Блажени будете, егда возненавидят вас человецы, и егда разлучат вы и поносят, и пронесут имя ваше яко зло, Сына Человеческаго ради. Возрадуйтеся в той день и възиграйте, се бо мзда ваша многа на небеси.

Причастен: В память вечную будет праведник: